

في شوارع مصر

في شوارع مصر / شعر

ربيع فرج

الطبعة الأولى ، ٢٠١١



دار اكتب للنشر والتوزيع

١٠ شارع عبد الهادى الطحان ، المرج الغربية

موبايل: ٠١١٠٦٢٢١٠٣

E – mail : dar\_oktoob@gawab.com

المدير العام :

يحيى هاشم

رقم الإيداع : ٢٠١١/١٧٣٤٢

I.S.B.N: ٩٧٨- ٩٧٧- ٤٨٨- ١٥٥- ٣

جميع الحقوق محفوظة ©

# في شوارع مصر

ربيع فرج

شعر

الطبعة الأولى

٢٠١١



دار الكتب للنشر والتوزيع



إهداء

إلى أمي ..

إلى رائحة الجنة ..



زحمة





كان ياما كان .  
تحت مبنى قديم ..  
في وسط ميدان ..  
بنوتة واقفة ..  
في عز البرد بتُفرك أيدها  
وهي بتستنى حبيبها ..  
و خايقة تبان ..

وواحد ماشي بيسأل

على عنوان ..

في عمارة قديمة

إتهدت ..

على السكان ..

و راجل أسمر  
نايم ...  
مادد إيده الفاضية  
وعمّال بيقول لله ..  
واللي يعدّي عليه  
يعمل مش واخذ باله

وست بتفتح عربيتها  
في إيدها خواتم  
تشتري قوت ..  
وبيوت ..  
لحارات من أمثاله ..

على صوت سواق التاكسي  
اللي بيُصرخ ..  
علي بنت جميلة  
شابكة إيديها ..  
في إيد الحلم المحني ..  
و بتعدي الشارع ..

والبيع الغلبان ..  
راجع ..  
بينط في أتوبيس الهيئة  
المليان ..  
اللي محمل نفس الناس  
بنفس هدومها  
بنفس عقولها النايمة  
اللي بتتدارى  
ورا عيونها المفتوحة  
بنفس همومها

بنفس البصّة من الشباك  
على نفس البنت  
الواقفة في عز البرد  
بتفرك ايدها  
وهي بتستنى حبيبها  
و خايقة تبان  
تحت مبنى قديم  
في وسط ميدان  
وكان يا ما كان





د صيف



فوق الرصيف ..  
واقف ضعيف ..  
خائف تعدي من زمان  
مع ان صاحبك ..  
نفس صاحبك  
والشوارع والبيبان  
نفس شباكك وبابك  
نفس بلكونة الجيران  
نفس النسيم اللي انت سايبه  
في حضان زهرية ريحان

نفس نور الصبح  
في عيون البنات  
يبقا إيه م العمر عدى ؟؟  
يبقا إيه م العمر فات

حبة عكار ؟  
غيروا لون البياض اللى ف عنيك ؟  
جرب تعيط  
يتمحي لون العكار

صوتك حزين ؟  
ضحكة واحدة  
ويختفي حزنك سنين  
جوّه قلبك  
تلقى نور الصبح بان  
ونفس صاحبك هو صاحبك  
والشوارع والبيبان  
نفس شباكك وبابك  
نفس بلكونة الجيران  
نفس نور الصبح ف عيون البنات  
يبقى ايه م العمر فات ؟؟

مالِك.. ؟





مالِك..

بقالِك أهل وناس ..

وممالِك .. ؟

مالِك..

شالِك سابِك ..

طار مع نظرة عين

البكر بكارِك ..

فضْ وفاض على حالِك .. ؟

مالِك .. ؟

ليلك حالِك  
قمرِك ضلِّك  
وضلِّك  
مات في الحارة  
ومات على الجسر ..  
ومات ..  
مع لون الخضرة  
وصوت الساقية  
وفرن البيت  
وياريت ..  
غُنا البنات  
ساعة العصارى  
ع الترع ..

وأيدين العيال ..

ساعة ما بيشكّلوا م الطين عريس ..

وللا النسيم ..

والتوته ..

والضلة ..

وللا اللي قام ..

ساعة الأذان صلي ..

يصحّوا فيكي ..

اللي نيّمتيه بإيدك ..

ما احناش عبيدك

ولا مفطومين ..

ساعة ماقولتي

يامر

عشقك أمر ..  
وضمتي لصدرك زيادة هم  
وغربتك عنى ..  
أحن من كونك وطن ..  
مالكيش سكن  
ولا جلابية تسترك ..  
يامه ..  
ضفايرك ع السكك ..  
والكل واعى ..  
للبعيد اللى امتلك

ماتز عليش يامّه ..  
الضُّهر أدنّ  
والديوك نايمه ..  
حالفه ماتدّن ..  
إلا وانتى بين عيالك  
ناصرين عزاكى  
ف وسط دارك  
مالك .. ؟



المولد





الدنيا مولد  
تايه فيه الناس  
غالب ومغلوب  
واللي بيقع ينداس  
دنيا دايرة  
وكل ساعة ف حال  
المولد  
مراجيح وعيال

ووشوش دراويش  
عمالة تبوح  
بكلام مسموح  
وكلام مكتوب  
ف قلوب الناس  
ممنوع يتقال  
المولد ..  
مليان أحوال ..  
والزحمة براح ..  
والليل بيقتوت ..  
وأنا من عشقي لحكمة ربك  
في الملكوت ..  
ماشي باسبح رب الخلق  
وسط الخلق ..

في المولد ناس ..  
مليانة هموم  
لاهي قادرة تنام  
ولا قادرة تقوم  
مع صوت الذكر  
وبكا .. ومديح  
وعيون كدابة ف وش صريح  
والعشق في شرع المولى  
.. حلال  
.. المولد  
مليان أحوال



راحة



روحها تريح  
بين ملامحها الحزن ييفرح  
جوه عيونها  
قلب العاشق صلى وسبح  
حتي كفوفها ..  
تحب تشوفها  
واما تسلّم .. غصبن عنك  
بتتوّه منها وفيها بتسرح

روحها النون ..  
في نهاية .. " كُنْ "  
والتراتيل ..  
وخشوع الجن  
حبّات سبحة ..  
سجدة شكر ..  
لذة سُكْرِ ف حلقة ذكر  
قبضة نور وإترشت  
جوه قلوب الخلق  
طرحت خير ..



طرحت فيض فاض  
ع الملكوت ..  
طرحت حلم ..  
ببشبه ضحكة بنت بنوت  
روحها سكوت  
لما الصوت يبقى زعيق  
واما صدور الناس بتضيق  
من كُتر كلامها  
من تُقل المعنى المتحاش  
جوة صدورها

تصرخ  
تسمع صدى صوتها  
تشهق  
تسكت  
ترتاح  
روحها اللحظة  
اللي بيرتاح جواها الصوت

روحها لا يمكن تتخيلها  
مرة تخون ..  
أو تتلون ..  
أو تجرح  
روحها تريح  
بين ملامحها الحزن ييفرح  
جوّه عيونها  
قلب العاشق صلى وسبح



شوارع



في شوارع مصر  
في عز الضهر ..  
الناس بتدور ..  
على عناوين الضحكة  
ف كل مكان

وف كل ميدان ..  
إعلان ..  
عن هجرات غير شرعية ..  
وناس محنية  
وناس منسيّة  
وناس بتخبّي الحزن  
ف ضحكة غيرها  
وناس ..  
بتبيع الحلم ..  
وتشتري حبة صبر  
في شوارع مصر



مغربية



عجباني جدا ..  
بصّتك من فوق لتحت  
لخُصلة الشعر اللى بتعاكس رموشك ..  
وغمازتين ..  
فى ساعة الضحك .. حدودة  
ولأن قلبى فى أولى عشق  
باستنى لما ترجعي وسط الغيطان  
و أتدارى وروا التوتة  
و أعكس الشمس فى عيونك  
تضحكى ..

تضحكك الشمس اللي نامت

فوق جبينك ..

مغربيه فلاحين

واضحك قوى على مشيتك

تتدارى بين ضل البنات

واعمل معدي

وأسبقك

وبطرف عيني التفت

ألقاكي لسه مسكته الليل

بين رموشك ..

كحل نايم من سكات

ولأن عشقي من زمان ..  
طلّة الليل فى العيون  
انده عليكى ..  
تجرى مني  
تتوهينى فى البيوت  
رسمة عيونك على البيبان  
والشوارع كلها لونك  
يا لون الحنه خطيتى على قلبى  
فصار قلبى ..  
كما لونك

وساعة لما بلقانى  
غريب عنى  
اطلع لوحدى  
فوق سطوح الدار  
ودارك ..  
على المدى مش دار  
دى طلة ضى فى العتمة  
يضحك النخل اللي واقف  
عا الواد اللي غاوى البرد  
ويميل عليكى تحسى  
يطقطق الجزع اللي محنى م السكوت

تقومي تبصى و تنامي  
كأنك جوه قلب الموت  
تطبطب الريح فوق كتافى  
وتحضن البرد اللى قام عيِّط دفا  
والنخل تمسح دمعته  
حبة نسيم  
طب ليه بتتغير ملامحك  
لما تتمرجح ايديا  
فى حضن ايد شارع قديم .





أحلامنا



ما تفوق بقا وبطل تحلم ..

واسكت أحسن

طقطق ودانك واسمعني

ما انت فاهمني

ايام ويعذلها المولي

وبكره هاتحلى

تعمل شاطر وهاتتفزلك

ابقا قابلنى

دا زمانا فيه اللي اتكلم ..

شبه الساكت ..

والدنيا ساعات تبقا ف ايدك

تلاقيها راحت ..

أحلامنا ..  
متأجلة على طول  
نتعشا دُقة ..  
ونفطر فول  
ويوم ما ربك عدلها  
نسكن في شقة ..  
في آخر دور ..  
وَعَتولنا تعبت وإتلحست  
وجيوبنا في الزحمة  
إتنشلت ..  
زهقنا نسأل إمتى وفين  
وقولنا قسمة ..  
وانقسمت .

جنة



غاب القمر ..  
والخلق نائمة  
وروحي مابتعرفش نوم  
ماشي أدور ف عيونك  
على سر الخلق  
م انتي النور ..  
وانتي الكعب بلون الحنة  
وانتي النسمة بريحة الجنة  
وانتي الضحكة اللي بتتباس  
من نن العين ..  
وانتي القلب الدفيان عشق

كل الخلق عبيطه وفاهمة

ان السكة تنور لما ..

قمر المسا بيطل عليها

مش فاهمين الناس يا حبيبتي

ان النور في جبينك انتى

ان الدفا من روحك انتى

ان ملايكة ربي بتنزل

لما بتسمع ضحكة روحك



تنزل تحكي لبعض حكايتك  
وأما يحسّوا بغيرتي عليكي  
بيطبطوا على قلبي المغرم  
وآجي بكل هدوء يا حبيبتي  
وأتسحب من غير ما تحسي  
واقفل رمش عنيكى علينا  
وأتمدد فى الحلم ..  
وأنام .



خلاص



الليل سكن ..  
رُكن فُ عيونك ..  
وابتهل..  
يمكن يصادف  
مرة فى قيودك  
خلاص  
ولأنى محتاج  
الخلاص ..

نويت أفوت  
وأفرد على حجرك ..  
هموم ..  
عودي اللي شايب ..  
من سجود الروح ..  
في حضن  
الموت .

میدان





لَسَاكَ مُصَمَّمٌ عِ الْوَقُوفِ

وَسِطِ الْمِيدَانِ ؟

قَاعِدِ تَدَوَّرَ ..

بَيْنَ وَشُوشِ النَّاسِ

عَلَى مَطْلَعِ قَصِيدَةِ

لِلْوَطَنِ ؟

والزمن ..  
عمّال يشدّ خطوط  
على جبين اللي رايح  
واللي جاى ..  
والشمس غرقانة فى عرقها  
والنهار ..  
عمّال بيرمح فى الشوارع  
بالساعات  
إزاي هاتقدر تتبدى  
أول قسايدك للوطن ؟؟

أول قصيدة  
للحبيبة اللى بكت  
ساعة نزيك معجزات  
لجل ما يشرب عطاشا الضُّهر  
فى الحارات ..  
ما بقيتش قادر ع السهر  
وسط الميدان  
بعد ما شابت ملامحك  
وسط زحمة  
الانتظار ..

ليلك نهار ..  
حتى العواميد اللي واقفة ..  
من زمن ..  
شدت رحالها وابتدت ..  
تهجر بطون الأرصفة  
ريح دماغك وابتدى ..  
لِمُ الورق .

حوادري



ما تلو ميش ..  
وما تسأل ميش ..  
وما تنده ميش ..  
وابعدي عني بقا  
وما تطلب ميش مني اللقا  
قلبك ..  
شوارع ضيقة

قلبك شوارع ضيقة  
والناس مداين  
والبيوت محتاجة خلق  
والحوارى اللى انتى سكنها  
بسكاتك ..  
هَجَرْت مني الكلام  
مش كلام ..  
إن حكاياتك مش غُنا  
د انا ريقى ناشف  
م العطش



سقياني حرك في الشَّتا  
واللى اشتكى ..  
طول عمره مستني الخلاص  
وفات حدودك ..  
وانتهى ..  
ولسه ماسك فيكي  
إحساسي الغبي  
بس انتى شاطره تطبطبى  
وتروحي وتقولى  
انكتب  
طب واللى نام تحت الكبارى  
م التعب ..

وتقولِي إِيهِ ف اللى اتصلب

على باب زويلة والفتوح ..

مدبوح ..

ومحتاج يحضنك ..

محتاج يحسك ..

محتاج يبوحلك ..

إفتحي

أمرك عجيب ..

نسيانه ليه برّه البيبان ..

ومسكنه فى حضنك ..

غريب ؟؟؟

دَمْعَة



كان..

بيعدى الشارع .. ده

وف ايده ملف اصفر ..

مطفي

لابص يمين ..

ولا بص شمال ..

في الزحمة

الخلق محاطينه

وحلمه ..

الدمعة اللي ف عينه ..

تتدارى ف حضن رصيف ..

بالفعل ..  
الدمعة اللي ف عينه ..  
وقعت جنب رصيف ..  
عدّاه بخطوه  
ولف يبص ..  
إتكعبل وسط الزحمة ..  
مات ..  
وقعت منه ..  
الدمعة الثانية .

مُدن





الليل دخل..  
الليل خرج..  
الضلمة مش محتاجة ليل  
علشان تكون  
داللى اشترى منك  
غُناه..  
بايت حزين  
عدى السنين..  
ع اللى انتى سايباه فى الخريف

مابقاش ضعيف ..  
اللى كتب اسمك  
على كفّه  
وطاف بيكى البلاد  
ماسك عليكى قبضته  
خايف لا قُطَّاع الطرق  
يلمسوا حرفك بسوء  
وانتى بصفائرك سلسلة  
حزّت رقاب اللى عشق  
واللى افترق عنك  
وغاب ..  
شطك معاند مركبه ..  
لا طال مرسى ..  
ولا حس بحنانك يوم

طب عايزه أياه مني  
لا عاجبك أشطبك  
ولا أطلقك  
بين القصايد ..  
تبتديها .. وتنتهي  
ما بقيتش قادر ع الغنا  
كل الحوارى والبشر  
حواديت قديمة ..  
ف ليل بدأ  
يكسى الشوارع بالملل

فاسمحيلي أستلف  
حبة غناوى للأمل  
لجل النهار..  
مايكون نهار  
وحاولي مرة تمدي ايدك  
للخضار..  
للنسيم..  
للولاد اللي رموا روحهم  
فى حضن البحر  
لجل ما يبعدوا عنك  
لجل ما يهربوا منك  
ضمي روحي بطيبة مره  
وانسي يوم انك مدينة  
دا المدن ملهاش ملامح  
طيبة ..

لوحدك



ماشى لوحـدك ..  
عمّال تضحك ..  
والأحلام بتفوت حواليك ..  
نفسك ..  
تشبك مرّة ف حلمك  
نفسك ..  
حلم يحن عليك ..  
و انت لوحـدك ..  
ماشى بتضحك ..  
والأحلام بتفوت حواليك

ماشي لوحدهك..  
زى الطير..  
مليان حزن لكن بيطير..  
وانت معاند..  
ماشى وواحد..  
كل دموع الناس  
في عنيك  
وانت بتضحك..



كل ملامحك ..  
هربت منك  
حتى سنينك .. سبقت سنك  
خايف مرة تبص في وشك  
تلقاك واحد ..  
ولا يشبهلك  
وانت لوحدك ..  
ماشى بتضحك ..  
والأحلام بتفوت حواليك ...  
نفسك تشبك مرة ف حلمك  
نفسك ..  
حلم يحن عليك .



فناد



نفس المكان..  
تحت الفنار الاخضر..  
فى رأس البر  
مليون حكاية بتبتدى..  
وبتنتهى  
تحت الفنار

بالليل..  
قالتها الموجه.  
واتنهدت حكايات  
لا عاد صوت النسيم..  
أنغام  
ولا عاد القمر  
فارد على شعور البنات..  
الضّى.

فوح





مخنوقة روح الكلمة  
جوّه الصدر  
حتى الحروف  
فى النطق بتعاكس  
وحلمت أشوف ف الشمس  
روحها البكر..  
لكن الغروب..  
فى شروقها بيعاكس  
ورماني صمت غروبها  
آخر العمر..  
قلبي انتفض  
وصرخت..  
مين حاسس..  
مخنوقة روح الكلمة  
جوّه الصدر

ملفوفة بنت  
بين الوريد والروح  
شاب الزمان  
داب الوريد وانشق  
سكنه الوجع  
والبنت حاضنه الروح  
متكحلة بيًا  
ودموعها فيًا تنشق  
فابكى العدم  
واحضن كيان مجروح  
يصرخ ملاك العشق  
غرب وشرق  
مخنوقة روح الكلمة  
جوّه الصدر

حكم القدر  
إني أتولد مكسور  
يحبى الأمل..  
تحت المطر والبرد  
حلم الخلايق ..  
عشق ..  
إتولد في النور  
لكن القدر  
عمره ما شاور حد  
إمتى الشتا يحمى فى تلجه  
طيور  
لو نسأله ..  
تسبقنا روحه ترد  
مخنوقة روح الكلمة  
جوه الصدر .



حدوة



قلبك حدوته ..  
و أنا الشاطر ..  
ومش خايف ..  
أتوه في زحمة الحواديث  
لا قلبي خاف من السور ..  
ولا من وقوف الحرس  
عشق اتولد في النور  
فارس وراكب فرس

عاشق ..  
وعارف سكتك  
ولاني حاسس غربتك  
بين الحكايات القديمة  
لحضنك ..  
جيت ..  
ما أنا الشاطر ..  
ومش خايف ..  
أتوه في زحمة  
الحواديت



وحكاية ورا حكاية  
وانا واقف مع حصانى  
يفوت العشق من بابك  
وينسانى  
وأستنى..  
تطلُ عيونك..  
أتمنى..  
تشوف الكُّحل والحنَّة  
وعقدين فُل م الجنة..

ولا جيّتي يا ست الحسن  
وما ل حلمك ..  
ملاني حزن ..  
وغاب صوتك ..  
و أنا غنيت ..  
م أنا الشاطر ..  
ومش خايف  
أتوه في زحمة الحواديث .

فیروز



كان فيه بنوتة  
جارتنا  
كل ما أبص ف عينها..  
بسمع صوت..  
فيروز  
في أغاني ما غنتهاش  
فيروز .

ولإنها كانت بتحب

قولتلها ..

تقول لحبيبها في يوم

يسمحلى ولو فى الشهر ..

دقيقة

وآجي أبص فى عينها ..

معاه...

علشان اسمع فيروز

فى اغانى ..

مغنيتهاش فيروز .

و غابت عني البنوته  
و فضلت استنى ترد  
و قولت ياريتنى ما قولتلها  
تقول لحبيبها  
ولما وحشني  
صوت فيروز في عيونها  
روحت عليها  
لقيتها في حضن حبيبها  
وكان سرحان ببص في عينها  
وقاعد يسمع صوت فيروز  
في اغاني ما غنتهاش فيروز .





دفا



انباقي م الحُضْنُ اللي مات ..

حبة دفا

وحيل ماييل

فى ليل عاجز

وصيف

بيرضع برد من صدر الشتا ..

ليلة رحيل الدمع  
من قلب السما  
مسنود أبويا على صدري  
وأنا مرتاح ..  
على راحته ..  
وبرد الليل ملا روحي  
في ليلة ..  
مغربة راحته ..

وكان مصلوب ..  
ما بين صوتي ..  
وبين صمته  
وأنا بزعم ..  
في وش الحزن جوه عنيه  
ولما تعبت ..  
رَميت جِملِي ومِلت عليه  
فَمال مني  
فإتسرب الحلم اللي ساكني  
واتمكن الغيم ..  
في اللي باقي ..  
م الحُضن اللي مات ..

ليلة رحيل الدمع  
من قلب السما  
مفروود أبويا  
بين دراعين العدم  
واتشرنقت رجل الزمن ..  
فى الحلق موت ..  
أصرخ بعزمك  
صحى روحك وانتفض  
خلص خلاصك  
م السكوت ..  
لا تنهزم

شَبَّتَ الرِّيحَ العَفِيَّةَ  
فَوْقَ كَتَافِ اللَّيْلِ  
وَفَطَمْتَ بَرْدَهَا  
لِفَلْفِ البَرْدِ الَّلِيِّ بَاقِي  
مُ الحُضْنِ الَّلِيِّ مَاتَ

ليلة رحيل الدمع  
من قلب السما  
البحر قام  
وتحت باط الشط  
فات ريحه  
وانا اللي راضع  
من كفوف الموج ..  
تباريحه  
شدّيت سواد الليل  
على الحارات



وحلفت أَلْفِيفٍ بالكفن

بأقى الحدود

ولا همّ نيش ..

صرخة ولد ..

أو بنت محروق قلبها

ولا هز نيش منها

احتمالات العدم

أو حلم قايد ..

ينطفأ

طب ليه يا أبويا  
حالفه الحدود ما تنفتح ؟  
كل الطيور الساكنة فيا  
بتندبح ..  
رغم إني حالف  
يوم رحيلك  
ما انكسر  
تسمحلى  
أعيط وأبات  
فى الباقي م الحزن اللى مات  
بحيل مايل  
ف ليل عاجز  
وصيف بيرضع برد من صدر الشتا .

مقام



بعد النيون ما ينطفى  
والميادين الوسيعة ..  
تضيّق  
لِم اللى باقى فى الشوارع  
م البتتر  
و ارحل بعيد عن أى حد  
وأى شىء ..

أَلْضَمُّ وشوش الناس  
كما السبحة فى إيدى  
وابداً صعودك ..  
واعلى ..  
وانسى إن الحياة  
راح تنتهى  
وان الملائكة ..  
راح يزاحموك فى الفضا  
كونك براح ..  
واللى اصطفاك ..  
أعطاك مفاتيح السما ..

مُر بسلام ..  
على النجمات فى ملكوت البديع  
واغسل بدمعائك ..  
طريقك للصعود  
روحك تسابيح الكرام والأوليا ..  
كل الخلايق ساكنه فيك  
وقت أما تبدأ ..  
فى السؤال  
م انت اللي فيك اتجمعت  
كل الصفات ..

يا من فناء الروح  
في عشقك ..  
مُبْتَدَا  
وَالْمُنْتَهَى فِيكَ  
الرضا ..  
وحياة مقام ..  
عين الوجود ..  
سيدنا النبي ..  
تغسلي روحي ..  
بنور ..  
بنظرة من روح الحبيب  
اللي سكن روحي



مع سجدتين  
ملفوفين في دمعتين  
مع ركعتين .. في حالة سلام  
صمتك كلام  
بالمختصر..  
حالك صفا ..  
جواك  
خواطر نفسك الأمانة ..  
فارقت سكتك..  
كُلك ثبات ..  
والنور على جبينك ..  
دلایل ..  
رحلتك .

## الفهرس

٥	الإهداء
٧	زحمة
١٧	رصيف
٢٣	مالك...؟
٣١	المولد
٣٧	راحة
٤٥	شوارع
٤٩	مغربية
٥٧	أحلامنا
٦١	جنة
٦٧	خلاص
٧١	ميدان
٧٧	حواري
٨٣	دمعة
٨٧	مدن

٩٣	لوحدهك
٩٩	فناار
١٠٣	رُوحْ
١٠٩	حدوة
١١٥	فروز
١٢١	دفا
١٣١	مقام

